

‘Para sa Pamilya, Para sa Bayan’: Lokal na Mang-aawit Mula Alitagtag Magrerepresenta ng Pilipinas sa WCOPA 2026

Ni Angelica Araño

June 25, 2025

Alitagtag, Batangas — Irerepresenta ng 23-anyos na Batangueñang mang-aawit na si Princess Joy Ubaldo ang bandera ng Pilipinas sa gaganaping World Championship of Performing Arts (WCOPA) sa 2026.

Ang WCOPA ay isang prestihiyosong taunang International event, kung saan libo-libong kalahok mula sa mahigit 70 bansa ang magtutunggali sa iba’t ibang larangan tulad ng pag-awit, pagsayaw, variety arts, at modeling.

Matapos ang unang tagumpay sa audition at pagkapili bilang pambato para sa WCOPA 2026, sinimulan ni Princess ang kaniyang matinding paghahanda para sa nasabing kompetisyon. Kabilang dito ang regular na vocal training, pag pili at pag practice ng iba’t ibang kanta, at paghasa ng kaniyang stage presence upang mas maipakita ang galaing ng Pilipino sa laranga ng pag-awit.

Si Princess ay nakatakda sanang sumabak sa WCOPA ngayong taon, ngunit dahil sa personal na pagsubok sa kanilang pamilya, partikular sa kalagayan ng kaniyang ama, napagdesisyunan niyang ipagpaliban muna ang laban. Sa tulong ng kanilang national director, inilipat ang kanyang official representation sa WCOPA 2026. Ayon sa kaniya, mas naging pabor pa ito dahil mas mahaba ang oras para sa preparasyon.

“Mas pinili ko muna ang pamilya. Pero mas may dahilan ako ngayon para lumaban.” ani Princess.

Para sa isang lokal na mang-aawit mula sa Alitagtag, Batangas, ang pagkakataong kumatawan sa bansa ay isang karangalang hindi niya inaasahan, ngunit buong pusong tinanggap. “Sobrang saya dahil isang karangalan para sa akin ang ma-represent ang Pilipinas sa ganitong patimpalak,” kwento niya.

Bata pa lamang ay hilig na niya ang pagkanta. Sa mga school program unang nasubukan ang kaniyang talento, at pagtungtong ng highschool ay nagsimula na ring sumubok sa mga amateur singing competitions—doon niya tunay na nahubog ang kaniyang galing at tiwala sa sarili. “Dati sobrang mahiyain at nerbyosa ako. Hindi ko talaga kayang humarap sa maraming tao,” aniya. “Pero dahil sa karanasan at pagsali-sali sa mga kompetisyon, natuto na rin akong tumayo sa harap ng madla.”

Ang kaniyang inspirasyon? Ang kaniyang pamilya. Lalo na sa side ng kaniyang ina, kung saan may mga kamag-anak siyang kapwa mahilig sa musika—mga tito at pinsan na mang-aawit rin, at pangarap ding maging professional na performer.

Bagamat naantala ang kaniyang paglahok sa WCOPA, hindi nawala ang apoy sa kaniyang puso. Sa halip, mas nag-alab pa ito. Para sa kanya, ang WCOPA ay hindi lamang personal na tagumpay kundi isang pagpapakita ng galing ng mga Pilipino sa buong mundo. “Gusto kong ipakita sa mundo na ang mga pinoy ay isa sa mga pinaka mahuhusay na mang-aawit,” wika niya.

Sa ngayon, bukas si Princess sa anumang tulong o suporta mula sa mga indibidwal, opisyal, o organisasyong nais tumulong sa kaniyang WCOPA journey. Aniya “Patuloy po kaming kumakatok sa puso ng mga kamag-anak at lokal na opisyal na maaaring tumulong sa akin.”

Hindi man matuloy ang kaniyang laban ngayong taon, dala niya ang aral ng pagtitiyaga at pananalig. At para sa mga kabataang nangangarap din makilala sa larangan ng sining, ito ang kaniyang mensahe:

“Huwag sumuko sa laban. Huwag matakot sumubok. Magtiwala lang sa sarili.”

Sa bawat himig na kaniyang aawitin sa darating na WCOPA 2026, hindi lamang talento ang maririnig—kundi kwento ng sakripisyo, pagmamahal sa pamilya, at paniniwalang kaya ng isang simpleng Pilipino na ipagmalaki ang lahi sa buong mundo.

| Angelica D. Araño, BChannel News Intern | : Princess Joy Villanueva
Ubaldo/FaceBook